



## TPC Bubendorf - Fasnacht 2013

### „mir shoppe rund um d'Uhr“

D' Wält isch nid untergange - mir si alli no do  
obwohl doch kei Stei meh - uf em andere sett stoh  
derbi hei die Mayas damals - ganz eifach Füürobe gmacht  
und scho hei spöter es paar Hirnis - settigi Grücht entfacht.

Es git au hüt no so Type - wo prophezeie wie' s wird laufe  
und eus mit Angscht oder Gfühl - d' Zuekunft wei verchaufe  
zum Bispiel - d' Wärbig, d' Boulevardpräss oder Spekulante  
aber au dr Mike Shiva - mit allne sine Esotherikdante.

Für 4 Stutz 50 pro Minute - mit Chopftuech und Chatzefote  
duet dä alleistehendi Fraue - im mittlere Alter berote  
mit so vill Energie würdi dä lieber - anstatt Blödsinn verzelle  
als erneuerbare Brennstab - eusi Stromversorgig sicherstelle.

Do lose mir lieber dä Muototaler Wätterprophet - mit de Ameise a  
wo, wenn die ihri Auge verdreie - schöns Wätter vorus säge cha  
also bi Fraue funktioniert das mit em Schönwätter - aber definitiv nid  
wenn die d' Auge verdreie - chasch sicher si, dass es e Gwitter git.

**Für Prophete und Quacksalber - git' s kei Zensur  
die lön eus lo shoppe - rund um d' Uhr.**

D' Fuessball WM goht an dä - wo mit Dollars duet prahle  
und d' Alimente - für e Blatter Sepp und sini Lüt cha zahle  
drum holt sich das Turnier - so ne Scheich us em ne Emir  
in sini Wüeschti - zu nere Schwitzkur bi fascht füzig Grad.

Sogar d' Wettmafia mischlet mit - und das ohni Mueh  
und düe derbi einigi Spieler - en ere Ghirnwösch unterzieh  
zum Glück cha das im Hakan Yakin - aber nie passiere  
denn öppis wo nid exischiert - chasch au nid manipuliere.

Derbi sell dr Sport - doch e Vorbild für euseri Jugend si  
aber sälscht bim FCB - isch das mittlerwile vorbi  
am Cupfinal het dr Dragowic - nämmlig ganz ungeniert  
vor laufender Kamera - im Bundesrot Murer d' Glatze poliert.

Und dr Chippie het in Sissach - in der nöchi vom Mäc  
mit zwöi Promille e Hufte bout - und rennt denn no ewäg  
derbi het dä dört obe jo numme - so spoht in der Nacht  
welle go luege - wie me richtigi Hamburger macht.

**Au dr Fuessball isch halt - Business pur  
me isch am shoppe - rund um d' Uhr.**

Hesch vo letscht - au wieder emol dr Färnseh agloh  
und s' Gfühl gha - es sigi dört nüd Rächt's meh cho  
also mängisch dänksch - de hesch ein uf dr Chappe  
wenn dur s' Programm - fohsch afo durezappe.

Am Afang hesch no Freud - und dänksch oh jeh  
isch das schön - wieder emol e richtige Heidifilm z' gseh  
und erscht nach fünf Minute merksch - naiv wie de bisch  
dass das nur e Vorspann - vo „Bauer ledig sucht“ gsi isch.

Denn bi de next Topmodels - direkt uf Pro Siebe  
hüle es paar Teenies - und düe sich d' Auge usribe  
uf em RTL zwöi isch e sogenannti - Reality Story dra  
dört stritte sich HartzVier Empfänger - und schreie sich a.

Und im Dschungelcamp - uf em erschte Sat  
findet grad es Kakerlake-Wettässe statt.  
Will die Sänder ihri Ischaltquote - halt nid chönne miene  
düe die sich - mit immer meh Schwachsinn überbiete.

**Und als Zueschauer muesch - das macht di suur  
au vor dr Chischte no shoppe - rund um d' Uhr.**

Im Prospäkt vom e Schönheitschirurg - stoh wörtlich drinn  
wär nüd für si Körper macht - sig hüt nüme „in“  
im erschte Moment - findsch das no zum Lache  
aber gsehch di im Spiegel - duesch glich e Termin abmache.

Im Wartsaal zwöi Wuche spöter - grinst di die ganz Zit eine a  
du wirsch langsam suur - aber dä grinst immer witer, dä Ma  
dä lacht sie nid us - wird dir denn ändlig brichtet  
däm het me bi dr Gsichts OP - nur d' Mulegge z' wit ufe grichtet.

Und während em Warte - setzt sich stöhnend e Frau näbedra  
die het um sich umme - so ne riesegrosses Traggstell a  
us Mitleid seisch - sie dörf do hoffentlich bald wieder use  
do wird si hässig und meint - das sig dänk ihre neue Buse.

Das git dir dr Räscht - du willsch grad goh  
do gsehch so ne Gestalt - vom Igang her entgegecho  
die het Silikonlippe - und ihri Solariumhut mit Lack lo striche  
und duet anstatt dr Barbie - eher am ne Schrupfchopf gliche.

**Dr Kult um euse Körper und eusi Figur  
tribt eus zum shoppe a - rund um d' Uhr.**

Dass me nach em Füürobe cha go poschte - gseh mir no i  
aber dass es derbi immer spöter wird - cha' s jo au nid si  
me stell sich numme emol vor - mir wei' s nid hoffe  
zum Bispiel dr Coop hätt bi eus - die ganz Nacht dure offe.

Do würde im Dämmerlicht - mit Morgemantel und Finke  
es paar müedi Gestalte - zwüsche de Regal durehinke  
die einte hei d' Bettfläsche derbi - die andere dr Wini-Puuh  
und als Musig im Hintergrund - lauft andurend „La Le Lu“.

Im Reschtaurant git' s Kaffibröche - alli zwöi Stund  
bi dr Metzger muess me lüte - damit öpper chunnt  
und zum Schluss sitzt denn - s' isch nid zum fasse  
s' Ladefräulein - im Nachthemmli an dr Kasse.

Zum Glück isch das aber - jo nur e Scherz  
bis jetzt dreihet sich nonig alles - umme Kommerz  
mit dr Fasnacht zum Bispiel - isch' s wie mit jedem Bruch  
die muess eus niemer verchaufe - die chunnt us em Buch.

Aber grad d' Fasnacht - isch schliesslig derzue do  
um wieder emol einischt - über d' Buecher z' goh  
und drum froge mir eus - warum me öppis will durestiere  
wo letschtändlig niemer - dervo cha profitiere.

**Vo Ladeschluss und Rueh - kei Spur  
muess me wirklich shoppe - rund um d' Uhr?**

